

खबरां

- असाम, केरलम ते पुदुचेरी च अज्ज संज्ञा चुनांs प्रचार सम्पन्न होई गोआ।
- पच्छिम बंगाल च मतदाता सूचिएं दे विशेष गहन पुनरीक्षण दे तैह्त्त 27 लक्ख थमां मते मतदाता अयोग्य पाए गो।
- केंद्र नै प्रवासी मजदूरें गी 5 किलोग्राम मुफ्त बपार एलपीजी सिलेंडर दी बंड गी दोगुणा करी दित्ता।
- सुप्रीम कोर्ट नै सबरीमाला सने धार्मिक संस्थानें च महिलाएं दे प्रवेश पर सुनवाई शुरू कीती।
- पच्छिम एशिया च तनाव होर मता बधी गोआ कीजे इजराइल नै ईरान दे उर्जा बुनियाद ढांचे पर हमले कीते। अमरीका दे राष्ट्रपति ट्रम्प होरें धमकी दित्ती ऐ जेकर तेहरान होमुर्ज जलसंधि गी परतियै खोलने दे निर्धारित समें सीमा थमां पैहले कोई समझौता करने च विफल रौहंदा ऐ ते ईरान गी इक्क रात च तबाह करी दित्ता जाह्ग।
- आईपीएल क्रिकेट च राजस्थान रायल्स दा मुकाबला अज्ज गुवाहाटी च मुम्बई इंडियन्स कन्नै होग।
- मौसम विभाग नै उत्तर पूर्वी हिमाचल प्रदेश ते जम्मू-कश्मीर च अगले 3 दिनें तगर भारी बरखा पौने दी पेशगोई कीती ऐ।



Campaigning

असम, केरल ते केंद्र शासित प्रदेश पुदुचेरी च विधानसभा चुनाएं लेई प्रचार अज्ज संज्ञा समाप्त होई गोआ। अज्ज इस प्रचार दे समाप्त होने पर बक्ख-बक्ख पार्टिएं दे वरिष्ठ नेताएं मतदाताएं कन्नै जुडने आस्तै ते उनेंगी प्रेरित करने आस्तै बडे जत्त कीते। बीजेपी दे वरिष्ठ नेता ते केंद्री गृह मंत्री अमित शाह होरें अज्ज आखेआ जे अगर पच्छिम बंगाल च बीजेपी सत्ता च आंदी ऐ ते सब्बे घुसपैठियें गी वापस भेजेआ जाह्ग। असाम दे पथरकंडी च इक रैली गी संबोधित करदे होई शाह होरें आखेआ जे उत्थूं दी बराकघाटी च घुसपैठियें गी आहनने च कांग्रेस दा हत्थ ऐ। उनें आखेआ जे कांग्रेस पार्टी नै बराक घाटी गी नजरंदाज कीता ते ओह्दे विकास आस्तै बी कोई जत्त नेई कीता। शाह होरें आखेआ जे बीजेपी दा मकसद असाम च बदलाव आहनना ऐ ते इसी बाकी विकसित क्षेत्रें दे बराबर बनाना ऐ ते औने आहले 5एं बरें च असाम विकास दी नमीं उंचाइयें गी छूग। उनें बीजेपी सरकार दे राएं आह्नी गेदियें पैहलकदमिएं बारै बी गल्लबात कीती जेदे च श्रीभूमिक च मेडिकल कालेज गी खोलने दा बी जिक्र कीता गोआ। तोआई कांग्रेस दे अध्यक्ष मल्लिकार्जुन खड्गे होरें बी गुवाहाटी च इक प्रेस कांफ्रेंस गी संबोधित कीता जित्थे उनें बीजेपी दे नेता ते असाम दे मुख्मन्त्री हिमांता विसवा हुंदे लेई आखेआ जे ओहू छडा अपने परौआर दे विकास आस्तै कम्म करारदे ना। उनें आखेआ जे केंद्र गी हिमांता हुंदी घरै आहली दे नां पर जेडी बाहरलें मुख्खें च जायदाद ते 3 मुख्खें दे पासपोर्ट ऐन, ओह्दे बारै पुच्छ-गिच्छ करनी लोडचदी।



WB-Voters

पच्छिम बंगाल च 32 लक्ख थमां मते मतदाताएं गी मतदान करने आस्तै योग्य दे रूप च पुष्टि कीती गेई ते तकरीबन 27 लक्ख लोकें गी अयोग्य चिन्हित कीता गेआ। चुनांस आयोग नै मतदाता सूची दे विशेष गहन पुनरीक्षण दे तैहत न्यायिक समीक्षा दे अधीन मतदाताएं दी पूरी सूची जारी कीती। पैहली बारी जिले दे मताबक जानकारी गी लोकें सामने रक्खेआ गेआ ऐ। रिपोर्ट दे मताबक 60 लक्ख थमां मते नाएं दी जांच चला'रदी ऐ।



PM-Article

प्रधानमंत्री नरेंद्र मोदी होरें केंद्री महिला ते बाल विकास मंत्री अन्नपूर्णा देवी राएं जारी कीते दे इक लेख सांझा कीता। जेडा सरकार दे महिला नेतृत्व आहले शासन बवस्था गी मजबूत करने लेई सरकारै दे जत्तें गी दर्शादा ऐ। इक सोशल मीडिया पोस्ट च मोदी होरें आखेआ जे सरकार म्हेशां नारी शक्ति गी प्राथमिकता दिंदी ऐ। उनें इब्बी आखेआ जे नारी शक्ति वंदन अधिनियम दी नीह रक्खने कन्नै मुख्य हुन महिला नेतृत्व आहले प्रशासन आहली बक्खी बधा'रदा ऐ जेडा विकसित भारत दा इक प्रमुख स्तम्भ ऐ।



Bangladesh-FM

बांगलादेश दे विदेश मंत्री खुलीलुर रहमान अज्जै थमां त्रै दिनें दे भारत दौरे पर ना। दौरे दा मकसद दौनें देशें बश्कार सरबंधें च मजबूती आहनना ऐ। दौरे दरान रहमान हुंदा विदेश मंत्री डा. एस. जयशंकर राश्ट्री सुरक्षा सनलाहकार अजीत डोबाल ते पेट्रोल ते कुदरती गैस मंत्री हरदीप सिंह पुरी हुंदे कन्नै बी मिलने दा कार्यक्रम ऐ।



Govt. LPG Double

सरकार नै राज्यें च प्रवासी मजूरें गी उपलब्ध कराने लेई 4 किलोग्राम दे मुफ्त बपार एलपीजी सिलेंडरे दे रोजै दी सप्लाई गी दूना करने दा फैसला कीता ऐ। पेट्रोलियम ते कुदरती गैस मंत्रालय दे सचिव डॉ. नीरज मित्तल होरें इस सरबंधै च सबनें राज्यें ते केंद्र शासित प्रदेशें दे मुख सचिवें गी चिट्ठी लिखी ऐ। उनें आखेआ कि एह 5 किलोग्राम एलपीजी सिलेंडर राज्य सरकारें ते उंदे खुराक ते सार्वजनिक बंड बिक्री विभागें गी छडे अपने राज्य च बाहरा आइयै कमम करा'रदे प्रवासी मजूरें गी तेल सप्लाई कंपनिएं दे सहयोग कन्नै उपलब्ध कराए जाडना। पेट्रोलियम मंत्रालय नै आखेआ ऐ कि बधाई गेदी निगतरी च सिलेंडरें दी बंड प्रवासी मजूरें गी उपलब्ध कराए गेदे सिलेंडरें दी औसत दस्तयाबी पर निर्भर करोग। सरकार दे इस फैसले पर बक्ख-बक्ख राज्यें च दुए राज्यें थमां आइयै कम्म करा'रदे मजूरें खुशी प्रगट कीती ऐ।



SC-Religious Places

सुप्रीम कोर्ट दी 9 जजें दी संविधान पीठे धार्मिक थाहरें पर महिलाएं कन्नै फर्कोफकीं बरते जाने आहले मामले पर सुनवाई शुरू कीती ऐ जेदे च सबरीमाला मंदर दा मामला बी शामिल ऐ जिसलै जे कनून मताबक सबनें धर्मे च अपने धर्म गी मनने दी पूरी खुल्ल ऐ। चीफ जस्टिस सूर्यकांत हुंदी अध्यक्षता आहली इस पीठे च जस्टिस बी.वी नागरत्न, एम.एम सुंदेश, अहसानउद्दीन अमानउल्लाह, अरविंद कुमार आगस्टिन जार्ज मसीह, प्रसन्ना बी वराले, आर महादेवन ते जायमाला बागची शामिल ना। अज्ज सुनवाई शुरू होने कोला पैहले केंद्र नै लिखित दलीलां पेश कीतियां जेदे च आखेआ गेदा हा जे सबरीमाला मंदर च महिलाएं गी महावारी दरान मंदर च नेई जान देने दी पाबंदी गी बरकरार रखने दी अपील कीती गेई।

<><><><><><>

Vietnam-President

वियतनाम दी कम्युनिस्ट पार्टी दे महासचिव General to lam होरें गी उत्थूं दे सदन आसेआ आम सहमति कन्नै 5एं सालें आस्तै मुल्ले दा राष्ट्रपति चुनेआ गेआ ऐ। सदन दा आखना ऐ जे राष्ट्र असेंबली सत्र च 495 सदस्य शामिल हे, जिनें कम्युनिस्ट पार्टी दे नामांकन दा समर्थन कीता ते 5 सांसद इस सत्र च अनुपस्थित हे। To lam हुंदे राष्ट्रपति बनने कन्नै वियतनाम दे सत्ता संरचना च बदलाव आने दी मेद कीती जा'रदी ऐ।

<><><><><><>

TN Nomination

तमिलनाडू च 7 ज्हार 600 मेदवारें आसेआ दाखल नामजदगिएं दी जांच कीती जा'रदी ऐ जेदे मगरा एह स्थिति साफ होग जे राज्य च किन्ने मेदवार चुनां मदान च रौहंगन कीजे जांच दे बाद केई नामांकन खारज बी होई जंदे ना। नामांकन पत्रें दी जांच होई जाने दे बाद मंजूर नामजदगिएं दी लिस्ट वेबसाइट पर कन्नोकन्नी चाढी जा'रदी ऐ। तोआई चुनां प्रचार लेई 14 दिन पार्टिएं कोल हैन जिस दरान ओहू मते शा मते मतदाताएं गी अपने पक्खे च करने दी पूरी कोश्ट करंगन। केई केंद्री मंत्री, मुख्मन्त्री ते सांसद बी चुनां प्रचार लेई तमिलनाडू दा दौरा करा करदे ना। पूरे राज्य च टकोहदा करिए शैहरें ते कस्बें च रोड शो, चबक्खिया पार्टिएं दे झंडे ते प्रचार अभियानें दे चलदे शैल रौनक बज्झी ऐ। अपनी-अपनी पार्टिएं दे समर्थन च लोक ढोल बाजे, नाच ते गीत गाने कन्नै कुसै बड्डे उत्सव आहला म्हौल तयार करा करदे ना।

<><><><><><>

West Asia

पच्छिम एशिया च तनाव होर बधदा जा'रदा ऐ कीजे कल इजराइल नै ईरान दे उर्जा बुनियादी ढांचे पर हमले कीते। इजराइल नै ईरान दे असालुयेह च स्थित साउथ पार्स गैस फील्ड पर हमला कीता जेडा मुल्ले दा सबनें शा बड्डा गैस स्टेशन ऐ। इस हमले कन्नै पूरी दुनिया च गैस उर्जा दी सप्लाई उप्पर डर त्राहू बदी गेदा ऐ। अमरीका दे राष्ट्रपति डोनाल्ड ट्रम्प होरें कड़ी चेतावनी जारी करदे होई आखेआ जे जेकर ईरान- समझौता करने च असफल रौहन्दा ऐ ते वैश्विक ऊर्जा आपूर्ति दे महत्वपूर्ण मार्ग होर्मुज जलडमरु मध्य तय समय-सीमा सोआं पैहले नेई खोलेआ जंदा ते अमरीका इक्के रातीं च

ईरान गी तबाह करी सकदा ऐ। राष्ट्रपति ट्रम्प होरें भारती समें मताबक कल बडुलै साडु 5 बजे तगर समझौते पर फैसले दी समें-सीमा तय कीती ऐ। व्हाईट हाउस च इक प्रैस वार्ता दौरान उ'नें आखेआ जे जेकर जलमडमरु मध्य बंद रौहन्दा ऐ ते अमरीका- ईरान दे ऊर्जा ते यातायात ढांचे गी नशाना बनाई सकदा ऐ। तोंआई ईरान नै युद्ध विराम दे अमरीकी प्रस्तावें गी खारिज करी दिता ते दुश्मनी खत्म करने- पुर्ननिर्माण सहायता ते प्रतिबद्ध हटाने दी मंग कीती ऐ। राष्ट्रपति ट्रम्प होरें नाटो मुखें सनें सहयोगी देसें दी आलोचना बी कीती ते आखेआ जे होर्मुज जलडमरु मध्य गी परतियै खोलने लेई उनें'गी मेद मताबक समर्थन नैई थ्होआ।

<><><><><><>

IPL

IPL क्रिकेट अज्ज राजस्थान रॉयल्स ते मुम्बई इंडियन्स आमने-सामने होगंन। एह मैच गुवाहटी दे बरसापारा क्रिकेट स्टेडियम च भारती समे मताबक साडु 7 बजे शुरु होगा। तोआई, कोलकाता दे Eden Garden च कल रातीं कोलकाता नाइट राइडर्स ते पंजाब किंग्स बश्कार मैच बरखा कारण रद्द होई गेआ। कोलकाता नाइट राइडर्स नै टॉस जितियै पैहले बल्लेबाजी करने दा फैसला कीता हा। कोलकाता नै खेडू रोके जाने तगर 3 ओवर 4 गेंदे 2 विकेटें दे नुकसान पर 25 रन्ज बनाए हे। कोई नतीजा नैई निकलने पर दौनें टीमें गी इक-इक अंक हासल होई गेआ ऐ।

<><><><><><>

Weather

मौसम विभाग नै अगले 3 दिनें तगर उत्तर पूर्वी भारत, हिमाचल प्रदेश, जम्मू-कश्मीर ते कन्नै लगदे पंजाब च भारी बरखा होने दी पेशगोई कीती ऐ। विभाग दा आखना ऐ जे उत्तराखंड ते कन्नै लगदे पच्छिम हिमालय क्षेत्र, मध्य भारत, उडीशा ते आंध्र प्रदेश दे समुंद्री इलाकें च बी किश-किश थाहें पर बरखा पेई सकदी ऐ।

<><><><><><>

Bangladesh India Meet

बांगलादेश च भारत दे उचायुक्त प्रणय वर्मा होरें कल उत्थूं दे प्रधानमंत्री तारीक रहमान हुंदे कन्नै मलाटी कीती तां जे दौनें मुलें आसेआ दपक्खी रिश्ते गी होर मजबूत कीता जाई सकै। बांगलादेश च भारती मिशन दे इस बैठक च दौनें मुखें दे बक्ख-बक्ख खेत्तरे च जन केंद्रित सहयोग उप्पर जोर भरेआ गेआ तां जे दौनें मुखें च राष्ट्र विकास गी प्राथमिकता दिती जा।

<><><><><><>

Rain-Highway

जम्मू खित्ते दे मैदानी ते प्हाडी इलाकें च दपैही बाद हौली शा दरम्याने दर्जे दी बरखा पौने करी मौसम हल्का सर्द होई गेआ ऐ। मौसम विभाग नै बुधवार संझा तगर बरखा जारी रौहने दी पेशगोई कीती ऐ। मैहकमे नै इस दरान उच्चियें धारें पर रूकी-रूकिए हल्की शा दरम्याने दर्जे दी बरखा ते बर्फबारी दी पेशगोई कीती ऐ। तोआई, डिगडोल ते खूनी नाले बश्कार भारी पस्सियां पौने करी जम्मू-

श्रीनगर राश्ट्री जरनैली शिडक पर दौनें बकखी दा गड्डिये दी आओजाई बंद होई गई ऐ। लोकें गी सलाह दित्ती गई ऐ जे ओह अगली सूचना तगर यात्रा नेई करना।

<><><><><><>

Culture Ministry

संस्कृति मंत्रालय नै समूलचे भारत थमां बकख-बकख फिल्म निर्माताएं ते रचनात्मक उत्साहिणं गी वंदे मातरम फ्रेम्स राश्ट्र फिल्म निर्माण दे मुकाबले आस्तै साहा दित्ता ऐ। वंदे मातरम दी भावना दे जश्र मनाने आह्ले इस मंच उप्पर इस मुकाबले च हिस्सा लैने आह्लें गी अपने रचनात्मक कौशल, नवाचार ते सिनेमा सरबंधी कौशल दा प्रदर्शन करने लेई मौका मिलगा। मंत्रालय दा आखना ऐ जे इस पैहलकदमी दा मकसद कलाकारी गी बढावा देना ते इस राश्ट्रगीत गी गाइयै अपनी संस्कृति ते राश्ट्रप्रेम आस्तै गूडा सरबंध प्रगट करना ऐ।

<><><><><><>

Shah-Cooperatives

केंद्री सहकारिता मंत्री अमित शाह होरें सरस्वत सहकारिता बैंक ते अमूल कंपनी गी 2025-26 बरे दरान 2 लकख करोड रपे कोला मते दा कारोबार करने पर ममारकबाद दित्ती ऐ। इक सोशल मीडिया पोस्ट च अमित शाह होरें आखेआ कि एह उपलब्धि सहकारिता बैंकिंग ते डेयरी क्षेत्र लेई नां छडी ऐतिहासिक ऐ सगुआं एह आत्मनिर्भर भारत बनाने दी जात्तरा गी इक नमीं शक्ति प्रदान करगा।

<><><><><><>

J&K Tpt. Projects

केंद्र शासित प्रदेश दे बकख-बकख हिस्सें धोड़ी सडकै राएं पुज्ज गी यकीनी बनाने दे लक्ष्य तैहत जम्मू-कश्मीर सरकारै ई-ट्रांसपोर्ट मिशन मोड प्रोजेक्ट तैहत 44 आनलाइन ट्रांसपोर्ट सेवां शुरू कीतियां ना। इन्दे चा 20 सेवां वाहन ते 24 सारथी पोर्टल राएं उपलब्ध कराइयां जा'रदियां न जिंदे च गड्डिणं दी रजिस्ट्रेशन, ड्राइविंग लाइसेंस, टैक्स अदायगी ते पर्मिट बनाने दी सेवा बी शमल ऐ। इस डिजिटल पैहल दी मदद कन्नै आर.टी.ओ दफतरें च जाने दी लोड गै नेई पौगा। आधार दी विनाह पर पंछान, ई-केवाईसी, डिजिटल दस्तखत ते ए.आई दी मदद कन्नै चेहरे दी पंछान जनेइणं सुविधाएं कन्नै ट्रांसपोर्ट सेवा च बडा मता सुधार ते सहूलत होग।

<><><><><><>

Guru Tegh Anniversary

सिखें दे नौमें गुरु, श्री गुरु तेग बहादुर हुंदे प्रकाश उत्सव दे मौके पर अज्ज मुख भरै दे गुरुद्वारें च विशेष आयोजन कीते जारदे न ते बडुलै सवेला थमां गै शब्द कीर्तेन, लंगर ते पाठ दा सरिस्ता कीता गेदा ऐ। अमृतसर च गुरु जी हुंदे जम्न स्थान गुरुद्वारा साहब गुरु के महल च विशेष आयोजन कीता गेआ। इस सिलसिले च कल बी अकाल तखत साहब थमां गुरुद्वारा गुरु के महल धोड़ी इक धार्मिक जलूस कडुआ गेआ हा। उपराश्ट्रपति सी.पी राधाकृष्णन, प्रधानमंत्री नरेंद्र मोदी, गृह मंत्री अमित शाह ते पंजाब दे मुखमंत्री भगवंत मान होरें बी इस मौके पर श्री गुरु तेग बहादुर जी होरें गी श्रद्धांजलि भेंट कीती ऐ। केन्द्री गृहमंत्री अमित शाह होरें नौमे सिक्ख गुरु श्री गुरु तेगबहादुर हुंदे प्रकाश उत्सव

पर देशवासियों गी शुभकामनां दितियां न। अपनी इक सोशल मीडिया पोस्ट च शाह होंरें आखेआ कि गुरु तेग बहादुर होंरें मनुक्खता दी रक्षा लेई सर्वोच्च बलिदान दिता। उ'नें इब्बी आखेआ जे जालम शासकें दे अन्याय ते अत्याचार दे खलाफ बहादुरी ते निडरता कन्नै पक्के पैरें खडोइयै गुरु तेग बहादुर होंरें करुणा ते हमर्दी दी बेमिसाल मसाल पेश कीती ही।

<><><><><><>